

北京圖書館 編

北京圖書館藏珍本
年譜叢刊

第 131 冊

北京圖書館出版社

□ 北京圖書館 編

北京圖書館藏珍本
年譜叢刊

北京圖書館出版社

第 131 冊

第一三冊目錄

武進李先生年譜·····	一
瞿木夫先生自訂年譜·····	二一七
書農府君年譜·····	三七五
平叔府君年譜·····	四四五
云翁自訂年譜·····	五六七

李夫子年譜稿成祭告文

維道光二十有一年七月八日吾夫子示疾於三河里第弟子蔣彤懼其德業不克詳於來世也謹綜其生平遞年隸事縱闕漏而不敢有誣蓋三更其稿而後克成謹以清酌庶羞卽九月二十有四日夫子降生之辰告於夫子之靈曰孔門分四科各就其性而宗不離自孟荀氏沒莫得七十子之墜緒各矜其得而道以支盍仰觀俯察太虛無爲形色咸備道之全體蓋如斯乃思塞習錮不致不兼已歷百千載於茲我夫子英質天挺俗師友不能圍博綜獨悟恨不親炙於洙泗之宏規夫子之名四海共仰夫子之文章政事學士咸服夫子之行

誼友朋相稱頌夫子之心終莫可得而知雖磊磊大節
十具七八而心之精微豈小子陋劣之所能追登諸史
孰爲馬班之鴻筆表諸墓孰爲柳歐之瑰辭嗚呼宏業
不朽盛德不滅其道自足俟百世而不疑夫子之靈尙
其鑒之

譜例

年譜之作始自宋賢唐人如韓杜之有年譜皆後人據遺文追述之謹卽所見其義例有可倣倣者列之左方焉

幼年無事則并甲子闕而不書先生若干歲下卽連書是年之事每事必別行以醒閱者之目三者並用莊起儔黃漳浦年譜例也

年譜中夾敘同時人之出處始末則本事之經緯愈明用秦小峴淮海先生年譜例也

書子生而不及女并不及兒女嫁娶事用孫岱震川先生年譜例也

譜中涉他人事間用雙注以究始末用呂培淇北江先生年譜例也

書甲子外卽首標在某處爲某官爲綱領用王宗稷東坡先生年譜例也

前後有相證明者則加案字亦用王宗稷例也

爵尊者稱公其次稱其官同輩人直書其字亦用王宗稷例也

間入時事以著源委用錢牧齋重訂少陵年譜例也
有後年之事凌入前年者如此則文直而事完用方孩未先生自敘年譜例也

文字有要繫者則全錄用龜山先生年譜例也

書登第時事用甌北年譜例也

書同時當道官階出處用鄒忠公年譜例也并有書其卒者用張師載陸子年譜例也

書子姓科第仕宦用精華錄漁洋山人年譜例也

書月數不書日數日數用支干用秀野堂昌黎年譜例也

所著書必具詳其源委用朱子年譜例也

年月有不可臆斷者加蓋字以傳疑用黃螢山谷年譜例也

時事之艱大者備著曲折用方望溪湯文正年譜例也閒及交遊朋燕之事用嚴榮王蘭泉年譜例也

酬應詩篇有故則錄其目用施愚山先生年譜例也

武進李先生年譜卷一

嘉業堂叢書

陽湖弟子蔣彤編

乾隆三十四年己丑九月二十四日先生生先生諱兆
洛字紳琦更字申耆號養一學者稱養一先生系出
熙河王氏本匡姓避趙太祖諱改爲王世居江蘇常
州府武進縣之夾山前明萬歷時六世祖諱本成者
幼孤播遷育於輞川李氏遂冒李姓生應楨應楨生
孟智孟智始定居縣東北大寧鄉三河口雍正二年
析武進置陽湖遂爲陽湖人生文騏文騏生衍曾實
先生之祖考也考諱徵蘭字黻亭縣學生
誥封奉直大夫先生試入武進學故係以武進焉

三十八年癸巳先生年五歲始從宜興路思元先生受
四子書與兄康齡同几硯思元名揆居奉直公嘗從
受業嘉慶庚申辛酉科江浙舉首爲崔暄崔錫華皆
思元門下士先生又以甲子爲江南解元時稱盛事
云康齡字五初人稱五初先生

四十年乙未先生年七歲病不能受業聽兄五初讀戴
記卽能背誦旣長乃補讀喪服諸篇

四十六年辛丑先生年十有三從學於外祖奚蕉峰先
生蕉峰諱賓字曰朝先生爲刊蕉峰制義者也陽湖
歲貢生篤學爲時名師愛先生英敏常令寢其趾晨
昏與講論焉賓第寅以進士官衡山縣有治聲

四十八年癸卯先生年十有五從學於黃耑孩先生先生英敏絕特每制一藝稍不當父師意則更爲之或一題成五六篇不終日而就好讀司馬文正資治通鑑及馬端臨文獻通考不期年貫澈首尾其節目要處皆能成誦後常舉以訓門弟子曰讀書有至簡要至闊大一法通鑑以知人通考以博物一經一緯稍有才分何患不一日千里耑孩名向榮以舉人爲銅陵縣學訓導

四十九年甲辰先生年十有六從學於高蘿簪先生赴邑試適與李鹿耑慶來連几坐各詢姓名遂定交時鹿耑長先生一歲已有工書名朋輩中相引重矣旋

與鹿耕弟心陔復來紹仔述來交並誼同手足始終不渝蘿簪名荃字芳余戊申舉人含山縣學訓導

五十一年丙午先生年十有八從學於呂雲莊先生雲莊名嶽自廩貢生是歲奚太宜人卒

五十四年己酉先生年二十有一肄業龍城書院主講者爲餘姚盧學士文昭學者稱爲抱經先生者也所鈐刻載籍爲當代最以梓人自隨在龍城時臧在東鏞堂顧子明文炳頗任校讎役講訓詁學先生意殊不屑學士深器異之

是歲奚太宜人服闋娶宜興路宜人兄五初娶江陰趙孺人未彌月而五初從從舅企廉赴京師蓋五初

以屢挫小試計入國子監試順天也

五十五年庚戌先生年二十有二補武進學生縣試第三府試及學院試皆第一冬兄五初旋里省侍是年始與江陰祝子常百十定交與書云足下立身行己抗心古人所處有斷限不自容其非亦不肯容人非所著作皆俊傑廉悍作作出芒砀未見深於情而不靡如足下者也人生何必時俗喜何必鬼神憐但得一二快處傾瀉肝腑發攄瑰奇亦足豪耳又云諸葛武侯誠甥書曰志當存高遠棄凝滯忍屈伸去細碎使庶幾之情揭然有所存倘亦吾儕座右銘乎子常孝於親而家貧幾於無日不通問與札必詢朝夕如

何有所籌借無不罄誠又慮其憂傷挫志書古人數事以廣之曰左伯桃羊角哀同入楚道乏糧度不俱生并衣食於哀而桃餓死戶文子叔愆子其思革子同入吳道乏糧度不俱生并衣糧於革子而二子凍死范式謂河道張邵曰後二年當拜尊親至期邵白母設饌以候之母曰千里結言何期之審耶是日果至卓恕從建康會稽辭諸葛恪言某日當復至省覲至日恪不飲食以須皆曰相去千里豈得如期俄恕至養一子曰若左伯桃戶文子叔愆子范式卓恕可謂難矣雖然吾尤賢羊角哀革子張邵諸葛恪也其與人也摯故死之趨之者若不及其自審也則至於

人爲之死而安然受之而不以爲疑向使哀不遇桃
革子不遇二子則冥沒而死誰惜式與恕不踐其言
其於一時之義何害而使邵恪之意不彰且使不信
不果得有所藉口其爲世道人心患尤非淺鮮也嗚
呼若桃式諸子者曷可少哉曷可少哉

五十六年辛亥先生年二十有三科試優等第一補廩
膳生員自是歲科試連拔第一聞譽日起先生文若
夙構不假點竄楷法尤敏妙每二藝一詩竟尙早出
別紙繕錄完好出場有求觀者取授之朋輩中咸歎
其神速爲不可及云

五十七年壬子先生年二十有四兄五初仍就試京師

時先生比年授徒家塾奉直公固篤於風誼凡親故子弟之孤寒者皆留而課於家負笈外來者亦不拒堂室恆滿賓至則宿從容談說登其堂者咸歎且羨而先生力學特爲勤苦披吟更深兩眼昏澀則以冷水沃面復讀時時害目用醫者說飲豬膽汁則愈其物至寒苦亦不避晨必起早弟子輩有晏起者亦不驚呼令冷水噴其面以醒之

五十八年癸丑先生年二十有五校讀趙一清水經注釋校讀宋樂史太平寰宇記校讀顧祖禹讀史方輿紀要皆購善本硃書小楷校錄絕精美先生自幼年卽留意地輿之學凡史部有涉地理者無不備致尤